

四庫全書

集部

欽定四庫全書

本堂集卷八十

宋 陳著 撰

書簡

與張師道

某詞候之紙又疎然非漫以簡門下著一不才之小兒
一年有半胸中卷卷一垂死之老友一日不忘用何言
語可謝萬一執筆而廢者不知其幾而所以感激遭逢

者自有鄉里之相間交朋之交誦來風去月之證明使
某有言則淺矣然執事施德于不報之地正未必欲人
之喋喋也不然則某罪萬萬聞春風薦口泰山重力為
兒深者切至寸步皆義地一飯皆仁天添灑寒家之骨
肉洗濯浮世之肺肝宰天下規模當自此始某因遣次
男淪至深下一則省其兄一則拜父執此兒所謂學邯
鄲步旅中不敢以累尊抱蘓少公謂見嵩華黃河猶未
見太尉今此兒非唯未見太尉而嵩華黃河亦未之見

者故使之一出以長意見執事試予進之叩其言觀其
氣或可在藉湜列尚微不倦之仁某無厭無厭某有不
可贖之罪本不敢吐而不敢不吐先判閫夫人近諭牛
岡既吉隨已寔玉某今於門牆為何人而之喪之葬唁
奠輓送之禮廢台慈能亮之否但知一從程朱之儀盡
併佛老之說立吾道幟救世人偏此實甚要草草修狀
不及他稟惟儒戶事尚其成終

與李昌翁宣慰

思衍兩山

其耄矣與蠓蚋刻為生與鳥雀粒爭食猶欲以世外氏
名徼龍門夙賁以身計後慮丐鵬海餘需苟非知我鮮
不以為笑追惟平生學道也雖不至於成學文也雖不
至於古學政事也雖不至于果與達亦欲培風鼓翼望
雲攀鱗顧有以尼之百步不五十歸蟄山樊垂二十載
無負郭田可飯無彭澤秫可釀分之所存安之而已然
厥先祖父以金為簞金諸老師宿儒以盆盎為古壘洗
而樞相斛峯先生至謂雲霧窓梧桐掖可以修筆硯下

執今焉黯然無聞之境將與草木同腐而何以見先世
及諸大賢於地下先生以一世泰山北斗力量足以扞
吾道精神足以新人材文章事業足以表當時垂後世
而某命也不猶未及以門間半面契堂下一言乃因次
子沆黃緣遺履之舊走千里干主謁輒韻老語使之八
拜袖投寵之覽采幾欲為老吕之窮出涕以沆為通家
子弟幾與孔北海等視俎豆之籠圍之綆援而梯登之
不遺餘力既而推轂于當路之要延譽于及門之客生

其氣勢長其光價盛心所主若欲一吹噓頃而程九萬里也不然則提學所在弱水外肅政臺在層霄上沆為何人而可以動如所志沆今又晉前以成終恩江山修阻風雨跋涉兩不借一短簷泯默而遣之非因為是汲汲也先生外庸升聞鋒車召不夙則莫其真得失之機毫釐霄壤若璞而器若苗而實方為已物造化之陶必自有處昔寇公于王元之韓公于尹師魯皆既沒之後用情其孤甚至某乃得身親見其子之有遇厚幸出韓

冠上數等下春之日回光燕谷之寒轉煥桃李門牆之
托可以雲來百世賡此待盡他何求哉言不盡意瀆尊
罪萬不勝戰汗之至九月九日某再拜

與石料院

德祥書

某歸棲山曲垂廿年杜門却歸雖生猶死知心滿天下
水流雲散非惟不暇問亦無從問月梁春樹徒于夢寐
中時耿耿耳某與尊執事可謂金石交而次子沉入娶
初不審德星所纏何野尺紙道舊不敢謾寄以聽浮沈

及其還家乃知八詠樓前如魯靈光獨存沆辱以通家
子進之丈席間勞苦之飲食之餽贐而繾綣之而長書
遺我別久語苦三復間恍不知其今為何時身為何物
尚有如此古道交情哉最喜尊年八十有三歷艱嘗險
之餘仁氣益粹壽履益堅掩關養高城居而有山林景
象亦足以自樂其樂也皆非所嘗計某亦已七十有九
與虎狼猿狖爭巉岩者數載今幸僅定而身兼數病日
於牖下俟殘息而已家有二百指累藜藿併日猶不足

有不才子四既無田可畊未免以故書為業世道日漓
且無售身餬口之地命也誰尤兩山先生以斗南之望
擅四海某雖受其叔父斛峯相公異知而未及一識面
沆投身化治過辱出手成就力所可到風舞而雷鼓之
不極不止某年事至此但知有溝壑在前安料其迫崦
嵫而生意動兒輩忽有所託況獲在詩書道義之門牆
乎某平生志願畢矣惟執事能知我心故言之不厭觀
縷馬裕翁仲伯謙之後如何言及此淚自瀉也徐子材

必尚無恙欲作一書又未知其詳或有邂逅時先為我道不能忘之意

答剡教趙實父

文炳

某別來二十年后五雲飛落窮簷如暵而雪渴而漿大
夢覺而風霽月明不知世之為何時身之在何處而有
如此其快快宇宙有今古道義無窮通一當乎心百里
對面非執事誰與昔之時謂得以志相諭步相逐魚泳
鳥飛上下四方也天不我與姑置勿道剡多賢今已晨

星而晦齋默翁應之亦已老矣所幸松柏照映歲寒如
鐵斯文一脈絕續不能以髮執事青春尚富其奚辭鄉
校之教放而推之天下衍而壽之百世皆自此始為今
之計是亦隱而求其志未敢以為賀而喜則有非人所
知者某辱晦齋知甚真猶記解縣組時造其門話言深
處至于銷黯此刻直到今莫能嗣一聚晤筋力既衰江
山又阻有極目而已應之二令嗣為學皆可敬比垂顧
一番庶與會應之相似聞默翁著書甚多足為不朽傳

不負平生笑第無從參請惟有仰羨面次望皆為斥賤
名道惓惓王東之不得其死斯人而有是哉翔父仰之
又相繼云亡言及痛淚滂下某今已八十有一是雖蠶
蠶債未足亦造物者固留以為不才欠死之罰一家二
百指苟活無策未免聽二子深沆竊稍于學校初心豈
其然哉次二子洽溶漫蠹書既無力從師取友于遠某
又耄不省宿學幸不狂惑而無所審辨亦委其為鄉人
耳不詭令兄正奏上登下炳者今無恙否侍次併致意

為感某今以出入息寄危景答字不覺覩縷但乏紙不
敵來施惟台慈其亮之

與韓君美經歷

居仁

某齋於儒而空虛無詩書味家於山而衰病無松柏姿
天地雖寬出門自礙食貧待盡而已迺者牽于鄉曲之
義扶耄入城客卧中古心相燠道義相忘一言一語皆
是春風時雨欣歡接洽不自意下春光景獲見中州人
物而於我如此也匆匆歸舟飛鞍臨餞且辱釘盤珍果

以寵遠歸此意何可忘哉近審趨覲有期里中人有數
詩寓感激某因得以拙筆序其卷首媿甚蕪斐必已沐
一笑所欠者筋力不任杖無從手攀去轡耳或傳書月
暫青少遲其驅果爾則當何時問西程耶此去天氣向
暑珍重珍重平步則粉闥直上則花掖等而前皆券內
物某年事至此猶可及快晴但相望將千里萬里奉顏
色則必無福分俯紙悵悵

與白縣丞

黽

昨辱垂顧愧坐貧無以延欸過荷不鄙辱以拜降治中
德政記筆某非不知屢下受福之自欲見發揚萬一第
年已八十有三舊學荒落不復為金石之文且山長黃
丈已嘗草就難於犯嫌自詭瑟縮辭遜久之而台意如
山不移衰耄凜凜承命段文昌為何如人豈敢與昌黎
前碑爭鋒當自有公論在特恃錦覆以免取辱幸也匆
匆上狀

與象山高宰

桂

其耄矣無機緣不及揖紫芝眉宇而于道旁口碑詭卓
魯之實甚夙比承蜚書實獲我心草草奉答計已徹覽
邑教舒竹西來備道雅意尤至衰病荒落之殘息本
雖于勉強瑟縮者久終於重辭茲藁以呈深懼發揚不
盡或高明自以為可則鳩匠擇篆蓋必得名世之筆膚
潦尺紙浼竹西以瀆

與秋仲實僉事

桂

某何物一耄吹微沫于驚波之餘託殘暉于晞露之上

與世情分隔也行臺頭轡誰欺聽衡訪枯根于無所先
容致老馬于人所放棄光風霽月間仁念惻惻火其灰
肉其骨千金其敝帚江空歲晚如此奇逢而某親之謂
當拱揖步趨朝夕左右津亭攀馬神黯心折非流俗所
能知惟是免沉于赤城受提獎造就迄于善解免浴身
事縋之深翼之困者極矣而卒未能仰副鈞陶命也追
惟感激雖殞首結草不足報萬一某今猶以奄奄氣息
據龜殼引蝸涎苟分寸陰以待天命區區此心姑曰有

子若孫在茲兒沈身其家之責以行阮途輶輶泯默而遣之或不能不累鈞慈耳推謝之忱疎怠之罪夢夢尺書何足以盡伏乞已任吾道為蒼生計

與袁竹初

洪

某自去春別後輦潭邃而有囂者之撓耿耿激激近諗歸自古杭清風便到山中何一快也彼為何物所恃何人敢吠其主鈴下之畜馬前之走世積憑藉以至溫飽及其蹈不測之危機不忍即視以敝帷敝蓋中物綆而

出之萬死之淵意謂殞身結草以圖報謝顧螳螂之怒
蚍蜉之撼至勞客滯於外者半載造物自公黑白以定
而我輩自有所可寒心者凶狡滔天名分掃地關係非
小某等如章甫已敝不足以存屨恐萍蘆豈粥之家皆
奴輩仇噬所及甚可畏也不有執事誰塞其源撲其燎
使之知有公道在鄉里何事不藉泰山力量此事若為
一家實亦為一鄉地此區區老懷忘其覩縷非固喋喋
塵聽瑩也耄矣決不能入府尺紙為意

荅州長官

罕察

求館驛堂名書

某比詣凝香閣下過辱慈憐衰耄狎加溫顧至於坐中
分席花邊肆筵畧不自以勢分相及使人感烈際遇夢
亦起舞也而稽於狀謝瑤緘飛墜倒置局蹐寵諭重修
德星堂成欲更名扁下問到荒疎之老仰仞謙抑既不敢
辭輒取東坡鳳鳴驛記中語有曰四方之至者如歸其
家樂而忘去于其中摘二字曰至樂或予其可則當求
名筆大書庶使登斯堂者敬其墨妙說其字義皆為之

贊歎新功則相公之名與之俱遠矣僭越某卧喝未遑
晉見伏望風凋笛簞冰碗蔗漿以葆日來之福

與周簿

信

某回頭揖別春又秋矣福纏在近時節辦香豈不我思
貧與病謀夏來無一日不伏枕至今出門一步如避湯
火嗣是竟成疎濶飛鞍上乳峯自是初心欲一叅會亦
坐不敏失于探問負欠奚及夜來得王甥書迺知龜日
戒行鸞雲同跨棠陰之留蔽芾筍班之上騫騰無計可

留有心相逐老火如許穉金未涼既難于扶曳至馬前一酌謾以一詩見意但側耳除音使桐鄉之民再歸父母之懷則某亦自慶于末境之際逢也惟是四壁蕭然不能擷一片恩月掉愧極愧極

答剡教趙實父

某衰耄不禁秋暑珍灑西來中有瀕風桂月毛骨為之爽快也蜚英教鐸淑艾鳴珂企予望之自此升矣學記下示仰仞不外伏讀三過乃知周禮盡在魯當使四方

學者共此一記諭及養蒙處書某又何能為後然雅意
所欲姑筆片紙就納或其領之以古道不至揮擲則已
甚幸若曰能助涓塵恐非其力此外可委託者某固與
世情隔來諸兒以問亦曰難乎其介以前也此意當自
喻旋便草草修答

與張師道

某比兒深沆繇席間歸來拜真翰勞苦耄境者至感激
古道在雲天上而精采燦燦皆玉堂風月何以稱愛某

恃厚予少懇某舊令剡溪得一賢士趙文炳家有源流
文學茂異聞丁郊漕薦實附驥尾以是別頭收第歸而
坐遠闕今而職鄉教善滿為進進計欲一晉謁恐無因
見訝分羽言為先某夙敬其人敢以予潔請試薄叩之
當有金石聲或置之夾袋其庶乎干瀆負罪

與台州史藥房同知 孝祥

某實先正先生門下人也勢分曼隔雖不敢套叙然亦
有舊不敢不自道先正先生以雙旌一節臨照江東某

時贊漕幕辱異知飛剡筆賁終身既知有閣下之賢日
欲立通家子弟以聽教誨而官鞅拘縻至甌城方得拜
揖光霽一再遂成久別時殊人遠耿耿悠悠自謂問祗
趾無復來日矣耕存忽從北來乃獲細詢之始諗簪篁
與立馬爭馳于齊魯之郊悵結若解而未快也今驅車
為赤城重而不肖兒沆適忝台校末緣可謂天幸際逢
其盛如滿替還家不及迎候先衆人八拜父執之前而
猶幸者解符未辦茲方再進庶可詣丈席下樞趨是亦

天與之機會某亦就得通几格敬以印再世之緣為之
爵躍非常人比閣下以氣局吞吐江湖以精神裁剪冰
玉一笑語一點畫落人耳目便是一世寶百世傳倘容
兒沆面領而心會之則為第三世在龍門屐屨間也此
非某之所望仰度閣下亦必欲以此惠後進所以敢于
屑屑天台景物為神仙窟宅人物多文詞淵源閣下淪
之以先正之理學發之以三蘓之文氣異時英偉森立
必曰自大賢始

答郡庠戴教授友招飲書

某僚寒也無炙手心忍飢也無食肉相耄而入城唾者
笑者總總獨也青眼溫煦若曰如老龐在左右垂死猶
可矜惻風雨中一帖何其渠切雖欲辭不可者亭午當
伏席下且叙且謝但宿為國器三速今且畧出關即回
兒子方當執經立雪亦辱寵呼過分過分更不拜謝諸
同寅丈

與孔明遠學正

昭孫書

某稟到又一月舟邊銷黯歸而成夢未嘗去左右不知
書擔何日出關某近卧寒不動寸步攀違無從也次高
吟一篇愧不工且無寸芹為侑知我當亮我本欲叙數
語却俟來年復為此來得以袖納意有在也或文旆偶
遲到春初恐可執手河梁然彼此行止亦自難必同寅
諸丈須日日聚晤為某一拜意自顧窮山寂寞安得
常相與川雲飛泳哉

答卞淮源書

某比者恭諭肅擁高牙分鎮大府精神奪日四窻星月
之增光號令如山三島風波之不動觀聽之下歌舞以
心某幸隸民編非不知禮實緣衰老既不克拜迎前導
又未克晉賀階除誰欺高明乃于縣尹面參頃垂及姓
名受之殊寵益重不敏之罪靖思回顧何以報稱當俟
秋氣稍清躬造于典謁氏既望開宥且乞予潔造化恢
洪式蒙從欲某願為歲寒一枝之雪柏也干瀆峻嚴下
情豈勝戰汗之至

與阮若山書

某山林衰耄殘息猶續皆慶雲紛郁之庇疇昔之歲嘗
因丁宰修尺牘謝寵問之及嗣是筆硯交寒且不敢屑
瀆清嚴遂坐曠域然辨香未嘗不望斗下先生以斯文
自任鼓春試之風開秋闈之地千里章逢九霄梯級其
將有望矣特本邑力役事尚累涑水憂心幸而邑丞許
君蒸然詩書之氣欲以此為第一義尚賴大宗主曲成
以了舊二尹所遺好事某雖不貧入等亦獲在鳶飛魚

躍中也秋氣稍深自當躬詣台墀一以償叅承之願一
以謝網維吾道之造千溷仞牆伏楮豈勝戰栗之至

留上乘寺主僧如岳

松澗


某薄宦于遠久不致問曾大父墓依慈雲以安感不容
聲古道場賴願力以修以完贊不容語忽聞近為洪水
後有外魔瓢笠飄然已在雪溪左右固足以見無貪戀
心無住著相但某去能聽師之去必欲挽而再來且與
老松修竹清泉白日相與某亦山林人也逐祿非其時

會即有歸守墳墓之日却不妨送詩擔出寺以別敢望
渡口船回勿使疊請或山門外他有為綆當相維以障
塞之不必過慮併祈罔照

又

某日望渡口船回之報飛帖劃來不論寄錫猶在雪溪
深處諾以近吉東還甚慰甚慰山林如舊鐘鼓又新園
音有緣先隴有託無量功德也山下小魔當隨緣鎮壓
彼亦何能為哉遣回茶榼多感但未以回供畧此不

他及



本堂集卷八十

欽定四庫全書

集部
本堂集卷八十一至
三

詳校官庶吉士臣李傳熊

主事臣呂雲棟覆勘

總校官進士臣朱鈐

校對官編修臣嚴福

謄錄監生臣金彥茵

欽定四庫全書

本堂集卷八十一

宋 陳著 撰

書簡

與陳監丞

尹平

某昨為家西之小淨慈說苦訴冤佛慈悲挾山以鎮諸
妄沂洄以正其源是雖不鄙過聽然此僧此寺於執事
亦有宿緣請言其故主僧如岳昔于剡上鹿苑有一覽

閣辱為吟八句末云何年了却癡兒事分我西禪一月
單江湖膾炙此閣遂有聲執事為慈湖法嗣小淨慈有
慈雲閣是先叔習菴名蒙齋書蒙齋因有詩云不見慈
湖二十年憂心如醉復如顛我來忽見慈雲閣恍若慈
湖現我前水後歸然如魯靈光執事主張此事即見慈
湖如岳自能詩前詩自皆有墨刻他日必能袖以謁謝
但聞免科米事已有涯而未登岸七層塔只欠一尖竟
須一手圓成或得令某拜松翁先生書又何必一篙點

過耶況此寺敗壞不可住已蒙松翁先生知其詳判給
文榜矣若更不孚又或轉摺勞費其有既耶某再拜惓
惓

答如岳講師惠物

某昨於溪邊一見正欠從容茲奉晚帖如續欠處何其
欣欣也餉我山中列品如覩太平林下風物感荷之深
所愧為衣鉢囊中重費雖念難消萬遍不足懺謝

答永固寺主僧德周

東隱
惠物

其鼻觀有素香舉頭而東翠囊紫粉黃以來世方修三寶供我乃饗十方施愧感愧感

答嶽上人惠物

某比欲疏塵煩上飛雪錦鏡左右開眼一番吾師至為我卸出山之笠與雲俱還留連設供同笑談者三日夜下懷感激便有棄下恩愛下嶺來屢圖以尺紙道謝坐冗未諧茲領素帖恍然在玲瓏紫翠間相對時也餉以山珍水竒真是顛倒布施試從虛空回向也知消受

不過郁助教高新恩本約到吾家後以雪寒且回城猶未及識之却先來擾聒上房想大開門戶不較此也草草占復

答丈錫寺主僧炳同

某自不交書無一日不望雲之南里也時重於遣僕遂不及問訊是月十日里有菊釀張子開來會因得知四大安穩為慰茲忽領帖字恍然如太白峰頭風前月下相對晤笑時上刹供鉢不交若非大智量運掉扶持其

不卷榻者幾希秋來多陰雨有薄租不蒸蒸日上朝
夕為謀今連日開霽造物者終不殺人如此轉示東發
翁所賜書其中有醒吟先生傳讀之快哉某月初亦嘗
以一書令茅山人專往寶福一帶尋問凡數日不得其所
以書還今乃知自留寶幢而將書者誑我也此老素苦
脚疾發動時亦可畏今幸瘳矣某亦有心脾疾時一
相聞我輩衰老又生不逢辰病且崇之造物更欲何如
耶付之一哂北歸者紛紛想各自有所得非世上棄

人所能知也某意終欲與東發翁會於藥師等處一番
須與之約定日分光景到此相知者一歲中可不一相
見邪言之耿耿業成則當相報之紙取諸舊劄之背掀
以復

與延慶寺主僧若圭

復翁

某言別又許時在家只閉戶每一接東隱必話及清候
以是不妨疎箋問伏惟邇來安穩如昨夏氣已清平麓
如畫紅塵三尺外此實大福地佛老婆娑消受得過頗

聞近亦有多事者想不直一笑某坎坎食貧兀兀待
盡東隱自知茲不贅說凡百比輒次後村韻三詩今易
紙寫去深愧非當家語相知姑付之一擲

奉文本心樞密書

某分恃字量天寬不以流俗觀人區區箋敬亦不敢自
外古道首祈涵宥某去年正月二十五日為浮屠清壽
致其忱於師門乞其門師退耕塔銘嘗貢尺書迄今無
回音豈浮沈之耶抑不果到也或領畧既而不以復于

某也茲又有此等事求轉瀆本以委折如前辭辭之不
得敬為饒舌萬望垂聽四明山心仗錫寺現住持炳同
自號少楚江湖之宿望儒而墨者也戒行與吾道並行
議論與吾文交綯某與黃東發諸人皆于艱危中為方
外友知其故深故敬之也至一日來訪備言昔住淨慈
靈隱濟大川者其先師也示寂遺言不欲造塔遺殖送
錢塘江中其徒與禪學僉議無以詔後世遂塔藏全身
詳見觀師物初所述行狀而塔銘則久欲投大手筆未

得其門今乃欲緣某登龍之舊而致其請某謂蘓文定
蜀人也嘗銘辨才之塔先生以蜀大老而銘大川庶乎
前後輝映當無不可況大川某里中人某少時識其面
而道不同未嘗交際但其時住鄉寺岳林岳林乃彌勒
道場以二月初八為生日百工之巧百物之產會于寺
以售于游觀者萬計大川大書一偈于山門曰契此老
公無計性不知生日與生辰春風桃李知時節特地
年年說向人觀此則足以知其餘矣其纖悉是少墊自

前來面白某非當行不能敷陳特以其與少野契而觀其嗣以信其師庶乎不欺席間敢乞與少埜以進游戲雄文以鎮壓山林亦足以見此道見尊于彼也某年已六十有八頭岑岑視茫茫拜書不勝瞻仰之情

答貝鶴隱道士景觀

某比于竹溪深處交顏接辭至今襟袖間猶有風露氣詩卷下教誦之敬歎弟老矣多病不能出一好語贊美然又不敢孤雅諭片紙求印可其以為然否何當造虛

白室揖清溪月眠翠柏風共世外數日樂之悵然間便
拏楮占復掛一漏萬切几融然

賀崇福寺主僧清澤住仗錫寺號南州

某茲諭發大用堂登太白席激南洲水漲湖海之波瀾
開北山雲還天日之世界龍象交舞鐘魚一新某方外
人也亦為之喜昨塵垂訪本圖隨錫入山以謝先辱以
觀盛事有尼其行徒深愧愧會晤自有因緣攀躋或在
他日饗粟泥采芳芷分半榻清吟于萬塵之表固所願

也

與雪寶寺主僧炳同

某昨辱回字有感受於纖悉師生日與佛夏冬相望直
是奇特吾與師相知門異心同但愧無以為壽一詩翼
辦香以上幸付一囑山上浮雲石邊流水知吾二人相
忘于塵埃之外外此則未必知也

答淨慈寺主僧法椿

齡叟

惠素洵

某辱素書布答之紙不稱比師出山山無顏師還山山

色還于我輩有何與但聞鐘鼓聲震江湖間正欲再賀
坐未遂飛書走餉推柴闥我知此意豈愧我不妨世外
真味饜老頑切几不惜一笑某頓首復

與伯似司門弟若論深媿

某白比辱示以黃親家所答一一哥盡是真情但此老
純樸未知時變吾人與之為姻只是令岳與之一語更
無擬議況今正是袁曹劫昏之時合為鴻光歸隱之計
而欲事珠翠備服用效驕奢之族鏗薄之風以眩耀人

目不惟吾輩所當問尤非今之日所當言世人眼孔淺利心熾苦淡則猶可安眠善睡稍為衆所指則是禍之門危之道雖身命不可保也況聞親家為門戶事多生計日以削如更勉強辛苦以華其嫁遣于親家既大有不便于吾人亦將大不安矣孰愈于荆釵疏棠古道相成自有餘歡也又況長兒深亦頗好古知禮不肯從俗何忍于娶妻面上討便宜廢正倫此幸有可教者且如親家說彼中艱關事體如此可畏吾里前此猶可苟活

兩年來亦已甚於親家之云云者縱有財用何人與辦事不是虛為此言今惟斷之曰簡之一字乃禮之本他又奚闕輕重親家所謂執柯只須賢夫婦斯言極當若他人徒見多事又如何更遠遠應信即非敢謂朱季四丈乃是密議更徐決之仍須吾人或因送令岳葬事或特入城約黃親家與吾弟面說一番庶幾從簡畢禮之議不更疑貳此等說話都是彼此相體便做骨肉親眷一毫鬲上語不可著也吾弟其善為我轉此意于黃親家

至祝至祝某白

與姪洙

某廿四哥自城歸知侍汝母旅寓城中且聞汝病浮氣
正塵視療今想已勿藥矣時節非古道路多礙不及遣
問惟有耿耿又聞汝父取道山路入括蒼意其便道到
家相聚而後行待之數日杳然豈仍繇舟津耶外翁與
舅氏葬事只在今冬嘗再三遣人叩之何節幹等處既
不得實中間聞有外翁處眷到城因而探問亦如之

想是為時事如此不欲遠處人來會葬亦是省事一端也吾人與外翁一家情義非他人比意必欲執紼以送而所聞不的衰老畏寒又難于輕動熟謀諸心不如俟葬後或待春和徑自到山北墓下今且以輓章先之葬未葬不問也如待外家諸舅表望以此意道及吾人亦自有書去亦有薄賻禮稱其家不欲不誠也向有書與汝父說黃山長親家處委折不知曾達之否此事非汝母與父主維則必有扞格者矣吾人此心皦然如日豈

親家猶以口聖賢而心市行者視之耶他日成婚後自
可知已世界已至此更要效流俗便勉強多費欲何為
者但婚嫁不得不了方來又付之造物耳若吾人得與
黃親家面說一番彼此家事大畧相似當共撫掌一笑
方知黃緣非偶然之故或會見須望盡言及之老伯母
附意致汝母更不他具伯信致宗魯吾姪

回姪洙為史氏請婚

久不知汝信但長孺來則詢及其畧悉抱疾甚纏綿今

幸已平復大為吾家學行正脉之喜不然則志堂之舊
鞠為烟礫忍回首邪汝爹爹處道院足矣若曰多欠世
變至此誰不苟焉苟焉者猶可安朝夕過此則是危道
況吾姪獲依史館而主于閫內賢而材詩禮之風八行
有光導之者之責汝其庶乎所謂姻事聞之雖契我心
然不無自視之慙當今滿天下皆時世妝山林之氣荆
布之素不惟家貧不能辦而老拙之見設使可辦亦所
不樂為以世祿之家過山東望族百倍惟翕翕於熟者

叢而趨不知賢主人何為卓卓其識骨尋此盟于寂莫
之底是可敬已而不可當也尚須吾姪面議或決於道
誼之好以清風相扇則纖悉先定可也其詳長孺又自
能言併幾知及伯信致宗魯吾姪

又

是月四日長孺于便中寄到吾姪書甚悉宗族之誼薰
然如春風薄俗而有如此大為之喜所謂阿妹姻議一
節老我之意專以待澹如水交然後分付近亦有如王

修齋之孫趙光叔之子見來相求而老伯母猶以情雖
通而地相遠為辭熟知善鄉先生之後固齋之子有賢
祖母如此絕識掃盡世味雅欲尋盟于綠牕寂寞之間
誦吾姪書來之語使我感動況老我未嘗妄與人交而
景正獨相得屢嘗話及潘夫人嫁時事夢想古道恨寥
寥莫續今而吾姪以純實慥慥之言行館于其家能成
其賢祖母之心子弟皆玉粹而矩正為之好速孰能間
之哉細味清風真足以一洗四明富貴之宿塵而漲小

范家欲綺羅而焚至庭之之駭浪況有如吾姪者隻字
片言如金石乎其又奚辭區區之忱猶恐其宗族之貴
僕奴之常以慣見者視酸寒陽是陰非浸潤所入機甚
危也更望與其祖母說透他日伯鸞德耀自以為可則
吾姪于我家之責盡我亦無不滿之心豈不卓卓乎快
哉老見近乎覲縷然亦不容不然也或以吾言相入則
是月廿一日之納采不敢自外却望委長孺先數日一
報或啟或劄不宜臨時以辦姻好雖曰夤緣要亦盡于

人事此外有恫見于所與長孺書中等幾照悉伯信致
宗魯吾姪

聞伯求弟死與姪洙

春初到今雖得風傳書館消息但欠一專遣謂諸兒有
入城暇可聚首審其詳也耄境擔多事日復日如夢中
夏五之三日忽長孺來首問吾姪動靜乃知有衰斬之
痛淒其生事年至七十亦今之死得其所者矣然汝
於此大事良不易辨須毀不至病以求無愧于禮則可

惟是母殯在室而父繼之至此則不容更托故以遲其
葬古者禮稱其家雖斂手足形而窆禮所許可為吾姪
計當痛絕世俗之費但於家後之山卜其稍穩便包藏
去處合葬磚灰石工費外一毫不徇浮議只在一月之
內能了是足為孝我本自來而近百病捷出以息計活
勢有不可行諸兒又通皆在外未回回則或有來者而
未可准且貧不能助惟遡風一慟而已或恐有以異教
誘其輕舉汝必自能底柱當不待我諄諄我年事至此

近兄弟之存者僅尉兄弟遠兄弟如山堂諸弟今又無
幾豈不可重哀也哉茲長孺便寄尺紙數字去餘須別
遣也老伯書致三姪

後批云切不可為陰陽亂說所奪有方道不利等
說若曰求利其亡者則萬萬無此理若曰欲利其
後則因父以求利是大不孝況必無此理我見山
泉伯不知道理日夜以陰陽為惑試看蟠輿之域
今日其後何如吾姪孝道當自有所主也

本堂集卷八十一

欽定四庫全書

本堂集卷八十二

宋 陳著 撰

婚啟

答長女滋許竺氏啟

及婚姻之時況當今日悅親戚之誥猶記初春欲牽聯
於世盟以繾綣於母黨伏承某人家兒甚稱信竹心之
有傳而某女姆師雖嚴曾蕙性之無取惟相知而有素

遂不問于其他六禮之常固尚往來一書以蔽亦從敬
簡庶于近吉得以速成夫婦貴和幸釵裙之無訝壻翁
交飭尚冰玉之相輝

答次女光許黃氏啟

嫁女必勝吾家請事斯語居今而行古道實獲我心契
盟既積于夙逢姻譜遂綿於新締伏承某人方十五六
已培吳下英博之聲而某女雖二八初惟縹秦中寂寞
之分且彼此各自生子而邂逅乃為同庚况羣貉無邊

兩門之詩禮猶在使玉葭不倚衆人之議論謂何無言
可辭拜命之辱式相好矣甚於草木之味同姑少遲之
當以棗脩之贄見不腆回篚虔載副藤

深納幣黃氏啟

娶妻如之何重於著代醮子命之迎貴乎及時亦惟因
親而親所以可速則速伏承令女聽從婉婉况姆教之
素閑而某長男某答問從容尚師言之自律雖我心之
實獲謂吾耦以則非然平日相知不待今日方饗風交

扇獨引清風言頓僕綏式開甥館由力行於古道宜曲體於真情使入其門牆將受孔氏之私淑迨歸於家室庶幾宗氏之善承敬修菲儀具載藤副

淪納幣竺氏啟

問竹君之譜我愛清風畫杏村之圖今猶昔日蓋因親戚之情話遂締婚姻之世盟伏承令女姆訓有閑寧事紅樓之習而某男某父書自讀粗培綠幕之功以類而求我心則獲然納采之後彼月簫其如流而東芻以期

忽星隅之在望茲仲冬之應候當初月之生明龜墨既從驪駢斯迎舅姑既老喜看二婦之同歸娣姒如春尤繫一家之相好

答黃氏請婚次女 洸啟

儒門嫁女本來徃之無拘甥館為賓恐淒涼之非便况匆匆其為約雖草草以難承然葭玉倚榮幸相通於心腹謂荆釵成禮當不索於形骸言甚釘金誰能轉石勉拜筮從之吉敬延車迎之親詩書味長應不羨食魚之

美瑟琴好合庶幾諧鳴鳳之昌

洵納米黃氏啟

男生有室合求夙好之門世變如輪又在早為之所茲
從容於情話因繾綣於姻盟形迹則無肺肝如見伏承
令女字笄垂及善自淑於蘭閨而某男某禮冠既行粗
不荒於藝圃其為伉儷是有黃緣況於娣與姒之間易
成敵耦此以姪從姑之後必無間言不占而孚適副所望
山林妥隱雅能同味於一家菽水承歡樂得知心之介

婦菲甚聘幣列於副藤

李女清許胡氏答啟

婚者合好慨古道之難逢娶而論財顧時流之方競茲
寵存於月譜且篤款於年盟君而問名我則拜辱况令
姪孫袖手竇偁之丹桂芳聞已騰而某女汗顏張氏之
紅絲素心自分蘭金以同而相問葭玉雖異而不知立
冰者無費辭如水而有餘味詩書契義扇兩地之清風
姻婭黃緣綿百年於今日其惟欣忭罔既敷宣

代制叅潘某為子請期出贅啟

月下多緣喜修盟之有日星隅在望貴成禮之及時爰
揆吉於命龜欲請期而奠雁仰效季諾俛效秦風曰承
我宗敢覬美容之隱褥相成以道尚觀桃實之成家不
腆菲儀虔登藤副

代人請婚啟

娶妻如何具存禮節事親為大盍審時權况同里之素
孚於繁文而敢畧伏承令女蘭儀婉婉本端脈於天孫

某男桂籍芳馨尚褰華於雪柏若而伉儷久矣寅緣卜
親迎之三周前小至之二日義者宜也既無欲速之嫌
母其遂乎當遂相成之願幣交惟敬藤副以將

代族父衡之之子觀請期啟

夫婦所以著代如鳳和鳴男女欲其及時宜龜近吉有
出於初意之外遂遲之十年之餘豈偶然哉斯今可也
令女靜閑閨則自矜翠袖之倚寒某男浪襲世科誰料
青衫之坐冷惟芝蘭臭味與之俱化雖薪楚綢繆久而

益親至於六禮之嚴亦以多事而略後閨望之三日將
婚合於雙星月桂近娥虛辱浪仙之贈句山林擇婦庶
諧德耀之齊眉醮承宗事因迎之子之歸曰從舅言此
在而翁之訓

代竺之實為孫納采許氏

門清石井依然瓢水之風地接金庭邈矣薇山之裔既
敬恭於桑梓且繾綣於松蘿伏承令女生於說易之家
而某孫男某忝在學詩之列尚式過趨耦雖大而難齊

鳴乃和于既卜婚姻以簡為禮庸訂初盟親戚之話皆情庶諧永好菲甚交幣載請副藤

代族姪津答屠氏請期

親譜相因式契寒門之卜妻嫁纓既許敢稽名閨之好
述况夤緣於裏言以印信於前定伏承令姪孫某家傳
折桂之手止或尼之而某女婦有采蘋之儀未之學也肺
肝如見形迹未忘寵來納幣之文遂及御輪之夕已已
應期辛卯為良茲實踐於夙盟非固違於先進筮從吉

日庶諧婚義之承宗扇以素風何幸春秋之知我不腆
回篚虔載副藤

代同甫兄為子溥請期王氏

和鳴協卜雖無陳敬仲之賢交飲盡歡已知王徽士之
意遂定盟於尺素曾何用於鏡臺古道相孚時妝頓洗
伏承令姪女嫁笄既許信季女之有齋而某姪孫戲綵
方娛及雙親之垂老倡而隨之為急醮以迎之敢遲時
已異而事亦殊幸無責備禮本六而今則一何礙權宜

嗣歲孟春四月乙丑爰趨驪駢之駕式符龜莢之從琴瑟成聲豈徒諧於夫婦屢纓加敬要善事於舅姑

代童親答請期

女子有家幸遂因親之好主人於廟致嚴迎婦之儀况筮日之汝從敬先期而我告是庸結悅以候御輪夫倡而隨勿訝荆釵之矯俗母命之日當知綦組之事姑草草回奩夔夔副積

代單祥卿天麟請期王氏

天合百年之好既定夙盟星當二月之期是為婚候爰
龜以吉式燕其歸令女閨則溫柔純是大家之女誠而
某門風淒冷愧非太真之壻身能無非耦之嫌乃辱因
親之聽如此特達安可綢繆後燈夕之三宵肅將雁幣
過花朝之七日趨駕驪駢適我願兮會言近只進佩紛
帨當如事父母之時退鼓瑟琴是又和兄弟之本自今
而後未占已字

代趙景文府教答董氏聘女

源出清河溢我研溪之秀輝分愛日晦於寶麓之陰風
為兩姓之婚姻本是一家之甥舅何妨新好不替舊盟
伏承令姪詩書有得於見聞三餘是力某女祭祀初親
於教訓四德則難適男當壯有室之年女合笄而嫁之
禮不先不後有因有緣須勝吾家所仰望終身之托此
正佳壻應不辭半子之勤不腆回儀登載副剡

代族姪孫煥為子應龍納采劉氏

尺素以盟幸締親親之好寸丹如炳樂從簡簡之宜居

今之時行古之道伏承令女教由姆習手姑袖於裁雲
而某曾姪孫某幹為父勤心未忘于映雪是月店之翁
巧於作合庶冰門之婦副我好逑敬飭箋辭薄將幣意
生而為之有室豈願束薪當其可之謂時小遲醮鰥其
諸欣忭罔既敷宣

代族孫楠興納采屠氏

男求擇耦要尋葭舊之盟女子有歸難泥筭年之及茲
獲繼於世好所深信哉裏言伏承令女幼已能勤曾不

違於姆訓而某姪孫某長雖自愛恐未免於鄉人詎謂
黃緣有成伉儷相示真情而行簡敢將薄禮以問名內
助得賢固欲副承宗之事偏茲垂老當早為佐餒之圖
欣忭維多敷宣罔既

代為董氏答聘亡姪演女

女許嫁姻孰若因親之舊男交聘幣莫嚴納采之初相
通以情一簡亦禮伏承令姪純儒同齋帷中之誦良勤
而某姪孫女某美壻隨緣絲邊之語奚有蓋先見之定

甚如月老以裏言所主屬之冰人謂於外實以何求惟知內助之為急勉承嘉命就白真忱室家皆願於早諧非敢後也母子方為之相倚姑少遲之非甚回奩條諸副楮

代黃甥正孫羅氏聘李妹

十里一長亭幸有粉榆之契兩家各生子可無葭玉之盟或者友琴假諸媒斧伏承令姪箕裘舊業不為流俗所移而某姪女織組功勤粗守清門之素尚從古道欲

締新盟况雞犬相聞本自通於肝膽而鳳凰協卜誰能
間於黃緣寵來問名之儀敬下對使之拜永為好也適
我願兮荆釵布裙亦曰稱吾家而嫁女衿纓綦屨惟知
相其夫之事親菲甚回奩芥於副幅

代竺少博為子穎請期吳氏

一舍而近久矣同風兩家之姻昉於今日庸申嚴於櫝
敬庶致重於嘉盟伏承令女姆訓素閑雅是竹修之女
而某男某父書粗讀忝為櫟壽之甥鳳卜既諧雁儀敢

後月乙丑而在望日癸卯以惟良當迎以車而俟乎著
男子有室正欲盡事親之心介婦入門要知不敵耦之
禮由中所望此外何求

代族姪孫

文煥

答唐氏請期

山聯樾蔭是為明越之相鄰村入杏花安問鄭齊之非
耦昨既嚴於納采茲又侈於申盟伏承令姪孫某藕谷
吟香應熟愛蓮之說而某女林下風韻頗吟倚竹之詩
此日好逑迨天作合雖女已許嫁足以行矣然母盍往

送止或尼之豈固為之綢繆盖有難於勉強幸遲嗣歲
習卜令辰事重婚姻要與松蘿而百世情通緩急尚希
桃李之一家菲甚回奩虔於副幅

代族孫霖為子灼出贅請期盧氏

二姓之合夙已定盟六禮之常節而行簡是為古道實
獲我心伏承令女蘋藻家風素習承宗之事而某男菊
松門徑粗知讀父之書乃有黃緣欲諧伉儷律應季冬
之吉筮從辛卯之良出贅為貧豈徒隨於流俗因親受

教正有望於清翁

代王得淦為長子請期董氏

八閭為聯同飲龍溪之祿二姓合好夙有月店之緣舊
譜猶香新盟愈侈伏承令女縷樓春好閑姆訓以自嚴
而某男綠幕夜長如師資之尚淺心固慚於非耦而相
與者甚真念男婚女嫁皆欲及時而室邇人遐何如早
結敬蠲筮吉親御輪周宜其家人要為長子孫之地承
我宗事庶副老舅姑之心

代前人為次子請期林氏

星舍飛纏曾借梅窓之光景月囊繫足實開葭譜之寅
緣况有裏言相成嘉好伏承令女蘭春猶淺已自有林
下之風而某男某槃夜初勤不足稱桂坊之喬心固慚
於非耦面相與者甚真亦知男女本及其時若曰婚姻
可權於蚤言歸于我敬以請期茲未冠未笄且各受舅
姑之訓迨有家有室庶能盡夫婦之倫肅將菲儀虔載

藤副

代董聲仲答孫氏請期

閱閱相求自是春風之桃李門闌多喜愧無貴氣之芙蓉惟皎皎其古心因源源其夙好伏承某鏗鏘蓬海之賦綽有芳聲而某女寂寞杏山之家粗因柔則得諧伉儷實自夤緣鼎來遺鯉之書過辱委禽之禮朱陳二姓之語當從今日以綢繆台明百里之間何礙片雲之來往

代吳竹溪為子定戴氏

問雪溪之津近在咫尺披月店之籍夙有黃緣嘗請托
於青鸞已言盟於素鯉伏承令女蘭窓仙侶信得雲英
之風而某男藝圃晚生難與季方者伍妄倚蒹葭之舊
復圖瓜葛之親幸齊眉之際篤於因親荷同氣之間贊
其可妻遂諧嘉好實獲我心投老於家惟欲生男而有
室為翁之壻尚期小子之成人菲幣將成副藤有白

代吳景年為子納幣求氏

父兄契好豈於一朝一夕之間男子婚姻定是載笑載

言之頃所合者道何假於人伏承令女四德俱全得親
戚之情話而某男某八吟無取乃門闌之素知惟相孚
之甚深不自揆其非偶然納采雖逾於九載而御輪姑
緩於三周亦知願有室願有家其如未及笄未及冠今
然後可冬以為期娶妻如何以承我事有義而已豈
在其他

代回請期兄弟同日娶

男女以正當其可之謂時婚姻孔云與其奢也寧儉雖

虛拘之非禮尚敬簡之為宜茲承饋篚之將乃有迎期
之約欲速成也能無從乎強令誠以妝梅所愧蕭然行
李兄弟式相好情有若於一家娣姒喜同歸盟永諧於
百世

代吳褪入贅戴請期

生男有室雖以壯而為期制禮緣情早成婚而亦可自
念夫妻之既老要觀子婦之相宜幸以聯盟敬庸親迎
及時以進後蘭亭修禊之辰不日于歸播桃實有蕢之

詠將仲莫雁先趣臨鸞

代董回陳定日

生而有室固宜穀旦之差昏以為期有感心星之在欲
速成也能無從乎第慚竹筍之清風所恃金蘭之雅好
寵來臺饋撞破門羅却則恐貽不恭受則罔知所報藍
橋有會倚看藍綬之榮梅信先春敢後梅妝之試敷陳
則淺欣忤維深

代董回迎物

男女以正當其可之謂時婚姻孔云與其奢也寧儉雖
虛拘之非禮尚敬簡之為宜來下婦儀俗不能免分有
客饋人所駭觀以將篚之所施何盈門之可詫俟之於
著固宜親迎之有嚴往之汝家毋訝于歸之欲速私忱
既控宿諾母踰

本堂集卷八十二

欽定四庫全書

本堂集卷八十三

宋 陳著 撰

婚劄

深問名黃氏劄

某伏以歲晚一晴春動萬物恭惟某官袖文章手主道
誼盟神示介扶台候動止萬福某三肅修書上中涓氏
仰祈委鑒某謂仁人君子稟光岳之精得陰陽之正何

物寒暑或敢抵巇以尊生為禱則贅某不敢某嘗登四
窓之上望十洲之東風月清明金壁照映目景景而心
搖也未諧參會徒因舍姪輩有倚玉之好如水之交時
得問起居以當責沈某拳拳某恭惟某官身都和氣胸
停太湖挹其光者薄夫自端霑其膏者淺學自澤用之
則黼黻天鐸藏之則金玉月評臨汝之濱薄揚其濶逢
掖者流固已疏濬而為濂洛之歸矣時不可留與雲俱
返賦蘭畹之庚寅書柴桑之甲子神益以固文益以昌

造物者正自有在也某非佞某山深地寒於名聞非其
偶舍姪孫某質弱學荒於東廂非其選親舊間備言令
愛女秀於閨房輒欲借裏言之重以姻盟請甚不自量
者而草木臭味相命一諾訂金何其幸何其幸然念舍
姪某慈恩叨題在長公吏部後由是而舍姪若獲在門
牆下列而又以舍姪孫某牽聯焉其為黃緣亦豈朝而
至此况流俗方如此滔滔清風自相往來我心實獲此
非人所能知也某禮嚴問名煩則為瀆雙釵朋幣敬以

將承倘賜慶外之照略物而領采焉萬榮萬幸某晉越
拜問台閣尊眷歲寒自春日用皆福嵩溪有委九頓願
承

淪問名竺氏劄

某維時天根動處春事有津恭惟某官偃薄山林範式
里開明示聽相台候動止萬福某敬憑子墨仰溷主書
某謂金庭古福地也仁人之居矜帶焉佩飛霞餐沆瀣
將與松喬為期尊生之請奚庸贅某夙嘗登陳嶺望竺

峯雲溶溶其相從水脈脈其相接東西一剡也特見賢
之機尚嗇此心忡忡然彼葭倚玉則亦既有日矣某恭
惟某官松老而秀蘭幽而芳脈夷山之風陰培高誼溯
陸溪之水早避浮名况多事之方酣彼衆人其皆醉我
則異是行乎自然吾道非耶何妨隱居以求志景行行
止當以君子而名鄉某非佞某不量舍姪孫某粗業箕
裘之傳欲階方寸之進方培日力敢謀早婚近者令弟
廿七甥備道姪孫女秀於閨房且親家愛一女以草木

之味相命牽聯姻盟定于片語某當何如其幸若曰非
所宜稱則有黃緣在某問名有嚴朋兼為禮不以菲訝
未占已孚敢徼惠於卓識之下而悉留之某僭易拜問
壺仙集祉與陽俱新丹霞有委條併請

深出贅黃氏請期劄

某惟禮以簡為敬不敢具世俗竿牘上塵几格首祈鑒
宥某疇昔之歲黃緣葭玉夙好奉長公成言騰箋詩禮
之門以舍姪孫某請婚於令愛九鼎之絨千金之諾如

響斯答山林冷緒忽其春華榮如之何感如之何今春
舍姪某前詣珂曲面申真禱還舍備道彼此契合之意
芝蘭與化而水相接有不足喻今為何時兩家男女得
以有室有家亦是風雨晦冥中自為天日世界若曰隨
流而流多事其事非惟所不當為正恐有難言者惟高
明表獨立其古道某之心實獲焉茲命龜得九月二十
二日戊寅之吉以是日納幣十月十七癸卯之吉以是
日戒舍姪孫某晉屏下成禮望始終特達即賜垂允亦

欲遲在冬末春初為有少掣肘未免縮以近吉如蒙推
一家肺腑之情凡百悉從仰請之欲使陽春和氣交扇
於澹泊之中萬幸萬幸其間詳委已令司門舍姪若控
白區區不能盡言亦乞台察

深再請期黃氏得吉劄

某近修尺牘以簡為敬且已拜謙答之賜茲有游瀆亦
不敢煩贅以取譴訝首祈澄照某昨以舍姪孫某請迎
期於蕭臺之下承命改吉仰見委曲相成之意隨以仲

冬之二十有一日丁丑訊之龜筮皆從轉懇趙哦松丈
先致此悃金諾響應豈勝感烈然禮不可不嚴情不可
直遂茲用虔襲既俞之寵進訂無易之盟當於是日醮
舍姪孫詣前矣其納幣之吉乃用孟冬十有七日癸卯
舍姪某託道義契已夙今而獲忝姻姬薄俗滔滔真實
自在某徼福其有艾耶爵躍良深欲言者淺切乞台察
請期黃氏深婦歸見劄

某舊為知心契今為肺腑親流俗贅辭古道所斥况敢

瀆尊聽耶某自留城獲交書歸來坐暑甌雖闕然起居
禮而長兒深前月中旬還舍恭諗冰壺澄凝火傘辟易
方將卷杜曲之旆上甬東之舟與仙眷同此清福某有
健羨而已某山居無他事但因昨來強出一番當盛暑
中內外受其病到今拂濯未退尚賴遠庇不至於終困
滯也某忱請曩常以秋冬為令女歸見之期告於特達
之前已拜重諾茲卜仲冬初三日丁丑是日為今歲上
吉且無世俗忌嫌天時人事維其時矣萬望垂聽以畢

道義之盟自是以後時節相從於山水風月間亦我輩
晚景樂趣豈非初意哉倘聞諸左右必亦神會而首肯
也更不效供日狀例等丐台照

答胡景參制機

三省為子幼文請婚李女答

某言念月燈追隨天風解后命我以草木臭味雲龍四
方上下其志也時忽其殊間濶至於十有五載初豈料
至此哉珍題自西南來讀之竟前日面顏中間心事一
時喚起如大夢方醒喜極不自知白髮之有舞也即日

雪後多雨寒中自春恭審文芒星搖德聞風遠台候神
相動止萬福判閭恭人一清偕老諸令嗣秘字淵乎家
學欽羨欽羨執事勘當千古為迂叟晦翁聯其髓脈而
盡其精神大有功於方來豈區區掇拾以布時名者比
某老矣不足以承教諸兒或在其弟子列某與荆婦領
累猶延分外殘息家事淒涼婚姻未了山東望族世方疾
趨秦中貧家誰復下米徐甥時節相過知某季女在室
遽以徹崇聽近傳雅意曰是可與謝庭玉樹侍巾櫛昌

歌羊棗嗜在味外今為何日而有此風茲者乃厯專諭
申以嘉命謙謙而渠渠焉是則徐生之言信矣何敢不
拜君辱三十餘年同袍之舊一旦而蒹葭有倚豈其偶
然第小范老子家法羅綺固非所可溷而叔鸞嫁裝亦
不能求合於時世眼高明當始終之申復潦草言不盡
意切乞台照

答胡表仁制機為姪孫幼文納幣請期劄

某伏以雲晴尚溢春意自豐恭惟某官為老成人游造

物表神示聽相台候動止萬福敬潔墨卿仰酬箋史某
惟天台秀甲東南人物所宅也何物寒暑敢冠左右尊
生之請奚庸贅某於葭譜有倚玉盟於杏園有同袍契
黃塵烏帽間邂逅聚晤舊亦數數投閒以來乃相望一
山如蓬萊之隔瞻戀良極某恭惟某官濂之霽月洛之
春風融於心而盡於面脫屣功名之路濯纓蕭散之濱
雪柏霜松傲睨萬境其所自得固在浮邱洪崖之外某
非佞某黃緣事契道義綢繆揮手崔盧之門主心梁孟

之譜遂以令姪孫直閣與某小女清聯姻冰鑑懸秋索
我出衆人之上某如此女得所歸矣萬幸萬幸某寵承
嘉儀有感真意星期相諗少遲何嫌拱而聽嗣音也某
敬拜問親家尊眷萬福攸同丹山有翫驅九頓以請

答胡表仁為姪孫請期劄

某伏以冬最宜晴春已動色恭惟某官卷舒以道相助
有神台候起居萬福某雪箋狂忱電矚為寵某惟赤城
峻極清望穆如傲視羲娥燕接劉阮尊生之請贅禱則

非某中年狎侍晚歲濶違時乎問天會豈無日機緣之
至姻婭以諧有喜拍懷不自知老某恭惟某官粹德所
都博學而與與人無競門外之塵不驚造物者遊壺中
之天自濶如此邈世盍亦隨時付功名於何有之鄉菊
松陶徑留方寸為方來之地蘭玉謝庭某非佞某以竹
筍木屐遣其女自是素風以荆釵布裙真吾妻誰與今
日惟高明獨行於古道而氣誼夙契於平時遂成此盟
不流乎俗且申言之諄複恐畢結之因循若曰非時貽

三星在隅之賦其惟來歲有二月初八之良欲迎以車
而歸於室此心如示惟命之承某仰辱委禽之儀寵報
命龜之吉重以肥羜加以鮮鱗揆禮過豐拜嘉惟謹某
再拜申問內閭恭人玉則靖嘉東閣學士瑤林森秀列
仙燕燕多祉穰穰麾鞭或加幞被以請

洵請期黃氏劄

某維時一雨新晴萬物生意恭惟某官養高珂曲有神
介扶台候動止萬福某倚玉雖稠尚稽參會辦香歸敬

惟日拳拳某恭惟某官以老成典刑與造物盤薄黃公
居四皓之列自樂者真叔度若干頃之波孰窺其際滔
滔彼俗卓卓斯人蕙帳甚恬雖曰靜而無動蒲輪或召
正恐用之則行某非佞某幸甚席因親之好眷誼崇篤
肯與令姪孫女與某學生某為姻盟既夙矣親迎之期
茲龜近吉惟仲春之月初九丁丑為可敢以請於下執
事第一真相與盡略繁文惟其時而不流於俗非高明
誰其領采倘辱矜從則桃李春風百世如一日也某區

區薄禮介諸副番不以菲涼見訝某再拜虔禱未問敢
乞珍畜天和粹凝山福蓬壺寶聚更不別拜問狀丹山
有委三肅願承

幼女冲回許史氏劄

某伏以一半春强十分景好恭惟某官得靜之體隨動
而宜神之相之台候起居納福某敬憑子墨仰酬主書
切祈鑒在某載惟積善必有餘慶多福在于自求君一
身造物者在某知歸矣奚庸贅某由西山望東甬百里

而遙獨以詩禮之門不以袞闕自負樂於取友寒士而
某獲與羣從間膠漆焉乃至今欲締婚姻盟豈不自度
某恭惟親家某官八行之後獨善之孫心事如薰感三
槐之先志世科相艷擅五桂之首稱盍奮迅以高飛願
回翔而小試綽乎餘地聽之在天富貴滔滔者彼流焉
能浼我道義怡怡而自澤不亦樂乎某非佞某冰門何
物月店有緣令姪學士與黃卷而優游師資自範某小
女安綠窻之寂寞姆訓未閑乃采菲之孔勤彼執柯者

狎至謂兩家夙契已化於芝蘭之中當一味真情相從
於桃李之外固辭則瀆永好以成某寵承內采敬用拜
嘉菲甚回儀介於副牘倘辱麾入不勝榮幸某矯首三
神山上五雲樓中與眷俱融何福不萃丹霞有翫驅敢
請

代族姪孫棟聘張氏笱

某即辰一煖逗晴萬綠秀晚恭惟親家某官望表里珂
心抱古道堂堂僕介台候動止萬福某謹洎子墨仰溷

主籤某謂赤松家風自有辟穀法何物寒暑者或敢抵
巖茵鼎衣篝之祝特贅耳某敢略某一村惟兩姓世世
為婚姻樂天之詩若為吾黨發也特南山之南北山之
北一片雲隔不得時揖長風此心當如之何某仰惟親
家鷺鷥之瑞松柏其姿富貴功名待以達人之見山林
泉石偃然隱者之風雖當世路之艱難正驗平生之素
志賦庚寅如靈均叟衆醉獨醒書甲子如淵明翁流行
坎止某非佞某家緒風淒書味日薄所恃草木相命桃

李有緣某舍姪孫棟固非東牀之才而采菲盛心屑以
令姪季五新恩長令女許締姻盟自今日始何其幸之
某以婚姻非幣帛不交輒以雙兼朋釵先贄初盟尚祈
鑒情而略物焉某僭易申問星聚有華日用皆福里中
有委惟命之承

代陳子得為子定杜氏劄

某伏以十月為陽一晴閣雪恭惟親家朝議怡心德里
袖手名鞭神示介扶台候動止萬福某敬蠲子墨仰溷

史鑑某惟沆花老翁忠不忘君一動一靜自有神物呵
護雲來源長福固未艾又奚庸贅尊生之禱某飲松溪
之源與門受三江者勢若有間然一水同味相聞亦孔
之夙特駕長風而拱一清尚遲到今某仰惟某官望表
枌榆姿凝松柏退藏於密視世變其若無俾壽而昌至歲
寒而後見雖不求於聞達乃尚有於典刑遺商老於山
中今為何日拜龐公於牀下亦可以風某非佞某門戶
素冷階庭不芳某雖未知教子而不可不思承宗學生

某雖未為成人而不可不為納婦竊聞名閥某位令女
既許嫁笄令某梅軒新恩誼篤金蘭力持柯斧是天假
以幸而相其成百世之盟今日斯昉某謂婚有六禮納采
其一也敬以某物及其書進尚鑒忱而略物焉某僭越
申問星聚有華日用皆福榆溪雖僻叢委敢辭

代定幼婚劄

某伏以雨又曰霽冬一似春

一作春
有餘寒

恭惟親家某官養

望名珂神不徹衛台候動止萬福某輒憑子墨仰溷主

書首祈涵亮某謂雪溪流風清立塵表何物寒暑或敢
抵巇用略去尊生之請某非簡也某繇丹壁遡金戕片

雲東西耳

一作謂城市之逼大隱所宅也

雖未見顏色草木臭味固已

相命於風往來也某恭惟親家望表粉榆姿凝松柏退
藏於密視功名如浮雲

一作夢境既付諸何有

惟適之安以道義

為實地

一作樂地綽乎其有餘

况宇宙之多事孰若山林之自娛

賦庚寅如靈均豈與衆人而皆醉書甲子如靖節亦曰
天命復奚疑某非佞某姪孫某頭方垂髻令姪女齒近

及齟偶悅親戚之話通知彼此之情謂婚姻貴嚴惟時
至而後可而夤緣或到於早圖乎何嫌況有斷金之言
遂獲倚玉之喜嘉盟斯昉私幸何多某通名之初侑書
以贄某物僭易馳上倘辱恕罪容留甚幸甚幸某僭越
拜問三神山上五雲樓中歲寒自春日用皆福里曲有
委九頓願承

代陳子得請期杜氏笄

某惶恐端拜申稟親家朝奉台座前某謂婚有六禮比

飭箋題已愧草草今茲裔狀加嚴是矣乃獲從簡非敢
自越禮貽譴斥道義之盟未占已孚亦惟其時而已首
祈涵宥某以朱陳村之寒門視杜韋曲之望譜非偶也
為學生某謀婚良自知分親家愛一女何敢妄有攀祈
梅軒新恩有高誼以表宗族有謙光以納鄉里主其議
曰是可妻也因得以薄幣問名矣多事之際於禮有權
仲春之月古者亦以此月會男女某有意焉而未敢必
傳音上徹一諾千金叢辰命龜二十有四日丁丑維墨

之食謹馳菲禮具列副藤以請以迎將俟於堂庶無綢繆束薪之後時而有天桃賁實之早計某幸甚幸甚仰乞台察

代前人謝杜梅軒劄

某皇恐某官座前某素來與木石居本難結芝蘭好鄉里不鄙進之俎豆間幸矣高明胡獨又欲納之倚玉之譜一語九鼎以其兄之子妻某之子世世婚姻豈無媒妁惟執事屈為之地則他人不得而方也令姪女既及


門詩禮之脈閨門之範上以承宗事下以宜家室昉自
今日執事之賜我者其有涯耶莫名所自感莫知所以
謝

代姪津答屠氏劄

某伏以宿雨新收潄清晨挾恭惟某官山林自珍鄉
曲是式神不徹衛台候動止萬福某敬憑子墨仰溷典
籤切祈委鑒某惟山之巔水之涯神仙宅也餐霜飲露
漱石枕流非寒暑能闔區區茵鼎之禱不敢贅某邈萬

竹之陰在片雲之外稠重倚玉繪成圖矣拜清揖和久
近不必問也某共惟親家詩禮之傳典刑之老閒雲不
雨人自借其清陰古井無波誰能窺其靜趣比天下多
艱之日乃山中獨樂之身與松竹而言交相看歲晚有
芝蘭而為瑞以待時來某非佞某脈絡葭盟黃緣柯議
謂令嗣省元宗事有屬方欲圖錡釜之供而舍姪孫女姆
訓粗閑或可為琴瑟之友兩家之好一語而諧且盡略於
世情將相成於古道因親及此何幸如之某承問之初

拜贄之辱雁幣燦其在篚鳳釵重於兼金備盡真情實
開永好菲甚報禮介諸副方幸判以留勿訝其簡某望
三神山起五雲閣燕景之樂駢休斯臻或有委驅敢不
祇肅



本堂集卷八十三